

欽定八旗通志卷一百九十九

人物志七十九

大臣傳六十五

漢軍正白旗四 楊宗仁 蔡良 魏經國 楊文乾 石禮哈

孫國璽 三泰 何立柱

楊宗仁

楊宗仁漢軍正白旗人由監生於康熙三十五年

授湖廣慈利知縣四十年五月調藍山四十四年

總督喻成龍巡撫趙申喬疏薦卓異遷甘肅階州

知州四十五年遷蘭州同知四十九年十一月總
督音泰巡撫鄂奇復疏薦五十年五月遷臨洮知
府五十二年以巡撫岳拜疏薦老成練達熟悉番
情授西寧道五十三年七月遷浙江按察使五十
四年十一月丁父憂五十七年八月補廣西按察
使旋署廣西巡撫十一月擢廣東巡撫五十八年
上以直省錢糧虧空甚多令各督撫立法清理宗仁疏言
粵東虧空現在嚴飭各屬勒限追完至于防杜將

來惟督撫司道府廳交相砥礪勿藉事勒索無論
正雜錢糧知府照例不時盤查庫銀隨征隨解米
穀實貯在倉毋許虧缺若州縣自行花費知府寧
肯代爲彌縫甘蹈分賠之嚴例州縣旣無由那移
掩飾卽虧缺諒必無多亦易補足倘敢徇縱除本
官嚴行治罪上司從重議處庶上下皆知儆惕若
地方有不得已之公務那用難賣州縣獨賠又難
使倉庫虧缺應以督撫等所得公項銀抵補如不

數仍設法公捐總不致課帑虛懸于清釐虧空不
無小補下部議如所請六十一年十一月

世宗憲皇帝御極授湖廣總督雍正元年正月丁母憂
命在任守制并停陞見宗仁疏請停給

恩詔應得本身妻室封典及廕爲父母求

諭祭得

旨俞允仍給封廕尋

賜孔雀翎四月疏言湖廣素稱俗薄民刁兵驕吏玩細究

其故皆由文武大員向所屬官弁索取陋規節禮
州縣必至橫徵私派武弁必至虛兵冒餉兵民挾
此逞奸員弁不敢過問臣今槩行禁革不許文官
有私派武弁有扣冒之弊庶兵民不得藉詞逞私
驕悍之習冀可默化潛消再兩湖地方鹽價逐漸
增長窮民每興嗟怨揆厥所由各官多貪鹽規商
人借此長價卽如總督衙門鹽規漸次加至四萬
從前一錢一包之鹽今則公然昂貴至一錢五六

分不等臣今盡革鹽規令商人減價出售以惠窮民俾地方漸有起色至于嚴禁官宦富戶囤積止令商販往來俾米價漸平與力行保甲稽查匪類等件皆臣職分應行之事不敢一一瑣陳得

旨覽爾所奏朕深嘉悅在他人猶聽其言而觀其行至於爾則信而不疑斯乃全楚地方否極而泰之機也五月疏薦廣東南海知縣宋瑋陞湖南寶慶知府廣州左衛守備范宗堯改補湖北漢陽知縣得

有姑允所請後勿踵行又疏言俸工一項乃

朝廷祿養官役之恩豈可任意飭捐以填貪壑湖廣
州縣以上俸工報捐已經十有餘年總無分釐給
發責成官役枵腹辦事焉能禁其不需索間聞今
自雍正元年起一切官役應支俸工臣俱令各照
額編支領俾均沾實惠從前凡有公事無一不令
州縣分捐實皆派累百姓臣通長核算但令州縣
于所得加一耗羨內節省二分解交藩司以充一

切公事之費此外絲毫不許派捐近奉部文又將解部餘平一分

恩賜免解承辦公事更得有餘况節禮陋規概行禁革則州縣亦易于補苴從前虧空矣得

肯所言全是一無瑕疵勉之尋以病請以子榆林道文乾隨任終養

詔加文乾按察使銜馳驛速赴並

遣御醫診視七月疏言湖北糧道管理全省漕運兵精一

歲中計有半年公出舊設驛鹽道管全省驛遞號
船應付勘合火牌准鹽刊楚盤驗察私督運額銷
引目職守迥異康熙五十八年依前督臣滿丕奏
以驛鹽道歸併糧道似未妥協請復設以專責成
下部議行九月疏言襄陽府屬之樊城鎮五方雜
處商賈輻輳奸宄易以潛踪請移襄陽府同知駐
樊城彈壓從之又言清淨盜源稽察窩賭窩逃法
莫善于力行保甲臣到任後卽通飭所屬令紳衿

兵役與齊民一體鱗次挨編保甲不許脫漏一戶
聯絡守望百姓稱便誠恐州縣奉行不得法令專
委本管道員稽察如有未盡合法之州縣卽令指
示照式編次擇其善者另予優獎得

旨此論甚好凡舉行一法必示以勸懲方期有效耳二年
正月疏言立社倉實係美政臣與各官加意講求
先擇地建倉然後勸捐穀本出納聽民自主不許
官吏會計侵肥並立獎掖尚義之典士民咸踴躍

爭先江夏武昌蒲圻等二十州縣各建倉三五十
所不等約共捐穀本將三十萬石效驗已著臣又
傳湖南循此成法施行得

旨據奏社倉一事於各省中爾先成創始之功殊可褒嘉
三年六月

諭獎督撫諸臣中居官行已可風有位者加宗仁太子少
傅銜七月卒于官年六十有五遺疏入得

旨楊宗仁敬慎持躬廉能供職効力年久懋著勤勞自簡

任總督以來潔已奉公孤介端方始終一節忽聞溘逝
朕追念良臣深爲悽惻難釋于懷應沛特恩以示優眷
加贈少保並給騎都尉世職准襲二次仍察例子恤

賜祭葬諡曰清端

御製像贊有廉潔如冰耿介如石句八年入祀賢良祠文
乾仕至廣東巡撫自有傳

蔡良

蔡良漢軍正白旗人祖士英順治年間官漕運總

督自有傳父毓茂康熙九年補佐領二十一年授
叅領二十五年從征噶爾丹逾年擢京口副都統
四十五年高家堰下濬河築堤偕都統孫查齊等
往督工四十七年卒

賜祭葬良由閑散於康熙四十二年授佐領四十八年授
叅領駐防福州五十八年遷浙江台州副將雍正
二年七月

詔直省副將以下遊擊以上員弁輪流來京視其漢仗弓

馬以辨優劣十一月良於箭亭引

見射箭

命發往陝西四年四月補漢中副將六月遷延綏總兵八月調江西南贛總兵九月擢福州將軍五年二月奏言閩省四旗披甲人等臣現在訓練鎗箭務令精熟行走不許怠惰其不能節省行事不合者盡力整頓更有兵丁之弟男子姪雖係壯丁尚未披甲游手好閒遇事生風自以閒散無人約束官長

亦漫不稽查今飭令各旗協參領防禦驍騎校等
官將壯丁內力可營生者任其自贍仍不時查察
其餘皆帶領習學鎗箭稽查出入行走之處若技
藝嫻熟毫無過犯遇有甲出卽選擇頂補倘不肯
習學而又爲非雖本家甲出亦不准頂補仍責成
父兄親族勸其悔改旣開其上進之路又示以不
能得甲之勢則知法者更加勉勵卽游手亦不敢
爲非矣得

旨此奏甚屬可嘉但務實力爲之加勉勿懈六年四月奏
言閩省駐防習氣不好臣留心體察實力挽回至
節儉所以省財亦以惜福每於操演地方諄切曉
諭務敦節儉禁紛華近來奢靡漸斂再如賭博酬
酒尤爲不法先飭四旗該管官嚴行約束又每旗
派撥官一員領催數名各按所管稽查得

旨嘉獎十一月叅奏左營副將金國泰右營遊擊吳廷元
酗酒不職

詔草二人職

諭內閣曰將軍蔡良覽其陳奏具見實心辦事伊名下有
代父應賠銀兩特加恩免其賠補以示眷注七年三月
奏言駐防兵丁向年賭風甚熾已嚴飭查訪又于
八旗派出領催四十名臣標四營派出百隊二十
名每月一換責令專管查拏今賭風亦覺斂息風
俗人心可漸轉移再查駐防報逃者甚多大半皆
係所買民人此輩原無根底無知兵壯只圖身價